

# Senza colliaziuns da glistas avessan pps e pld fatg dapli sezs

■ (rtr) **Senza colliaziuns da glistas avessan la pps e la pld survegnì set sezs dapli. Uschia fiss il parlament glischnà anc pli fitg a la dretga. Quai mussa l'analisi da SRF News.** Profità han però las partidas che n'avevan tar questas elecziuns betg già bles da rir. La saira dals 18 d'october è stà tut cler: La Partida populara Svizra (pps) e la Partida liberaldemocratica (pld) èn las grondas victuras da las elecziuns federalas. Las medias han per la gronda part punctuà il spustament vers la dretga, da l'austra vart però era in return a la normalità - la normalità d'in cussegl naziunal cun ina maiorità dal center-dretg sco gia il 2007.

## Senza colliaziuns avessi dà anc dapli sezs

Ussa vegn però anc in dagut amar per la victuras pps e pld: Las colliaziuns da glistas n'han betg gidà las partidas, ma bain custà sezs ad ellas - fin a set sezs. Gidà han las colliaziuns tranter autras la Partida cristiandemocratica (pcd) e la Partida verd-liberala (pvl) ch'han pudì mitigar lur perditas da sezs. Quai tenor

l'analisi dals effects da las colliaziuns da glistas ch'il politolog *Daniel Bochsler* (Center per democrazia Argovia / Università da Turitg) ha danov fatg en col-lavuraziun cun SRF News - questa giada suenter las elecziuns dal cussegl naziunal.

## En il Grischun n'avessi betg gidà

Cun la procedura da proporz favoriseschan las colliaziuns da glistas las partidas pitschnas. Sco tar las elecziuns dal 2011, nua che la pvl grischuna ha già l'uschènumnà «cletg dal proporz» en la colliaziun cun la Partida socialdemocratica (ps) ed ils Verds (pes). Il 2015 n'ha quai betg gidà la pvl che perda il sez tras la colliaziun da glistas dal center (pbd, pcd, pld). Pauc confiart dat a la pvl ch'i avessan era pers il sez senza colliaziuns da glistas.

## Ils resultats cun e senza colliaziuns da glistas

Era sche la pps perda sezs tras las colliaziuns da glistas, n'èsi questa giada betg uschè mal sco l'ultima giada. Lu-

ra aveva la Ppps pers otg sezs - ils bles sco en il Grischun era - èn ids a la pvl. Lezza da sia vart aveva da lezzas uras dublegià il dumber dals sezs cun las colliaziuns.

Ussa ha la pps 32.5% dals sezs en il cussegl naziunal (2011: 29.5%). Senza las colliaziuns da glistas fissan quai 35% dals sezs. Ensem cun la pld, la Lega (TI) e la mcg (GE) avessani 108 enstagl da 101 sezs. Quai na midass bain betg la repartiziun da las forzas, las accentuass però.

## PCD sco gronda profitura da las colliaziuns

Era sche la metoda dal proporz favorisescha teoreticamain partidas pitschnas, èsi questa giada la pcd che profitescha il pli fitg da las colliaziuns da glistas. Quatter dals 27 sezs ha la pcd gudagnà tras talas alianzas, sco per exempel en il chantun Son Gagl. Savens è quai stà cun l'agid da la pbd e la partida populara evangelica (ppe). Però era il novum da la colliaziun da pcd e pld ha gidà ils cristiandemocrats en plirs chantuns.